

che a vevin l'oblic di fâ une polse par ristorâsi tes ostariis. Al jere un mont pitoresc, chel cisicament, chel berlarili, chel sbraçâsi. La joibe e la sabide al jere marcjât, talians, furlans e sclâfs si davin une strete di man, une pache su la spale e l'afâr al jere cumbinât.

Po dopo a Cividât di militârs a 'nd jere une corentie mai finide. Lis casermis a jerin trê: une pe fantarie, une pai alpins e une altre pe artiliarie. La citât e je stade une vore dongje al front di vuere, dal cuindis-disevot, e i soldâts daspò lis bataiis, a vignivin mandâts in polse propit a chi. I soldâts a frecuentavin soledut dôs ostariis, cumò sieradis: "Al Bersalîr" in vie S. Pellico, al plan tiere dal palaç che cumò al è dal Liceu Classic e a "La Biele Gurize", in Strete Sante Marie di Cort. Par lôr i moments passâts tes ostariis a jerin un ricrei, un solêf, un legrecûr par dopo tornâ tes trinceris pantagnosis sot la ploie di bombis e di fusiladis, moments di vite tra vueris e violence.

Dut chest lu à glotût un passât che nus samee lontan. Cumò la insegne OSTARIE no si dopre plui, parcè che e podarès someâ une betule o un lûc par bevons. Cumò si clamin bar o di râr cafè, par altri in maniere no juste, parcè che a Cividât o savìn ce che al è un cafè: al bastarès nomenâ il "Cafè San Marc" che al puarte cun svant i siei dusinte e cutuardis agns. O chel in place des feminis: "Il Langobart", dal mêl nûfcent e vincj e cinc.

Par recuperâ lis ostariis di une volte o podìn lâ doi secui indaûr, judantsi cu la documentazion archivistiche ma al è ancje une vore interessant judâsi cu la memorie dai anzians.

O podìn scomençâ cu lis ostariis di **Borc di Puint:**

- Ostarie "dai De Rubeis" in vie Zorutti;
- Ostarie "dal Poç" in Place San Nicolò;
- Ostarie "dai Fraris" in vie Zorutti;
- Ostarie "ae Cjampane di aur", in plaçute Zorutti. E veve il fogolâr;
- Ostarie "là di Merseu" in vie Zorutti;
- Ostarie "là di Fonso" in vie Zorutti;
- Ostarie "là di Pittie" in Place Zorutti;
- Ostarie "là di Marie tracogne" in place Zorutti, vie borc di puint;
- Ostarie "al Leon di aur" in vie borc di puint. Ostarie cun stal;
- Ostarie "al Cjaçadôr" in localitât al Crist, tal cjanton jenfri vie Fornalis e vie Carraria;
- Ostarie "Di mai" in localitât al Crist, vie Carraria;
- Ostarie "Là di Marie Marione" in vie Carraria;
- Ostarie "Ai pelegriins", "là di Marcoline";
- Ostarie "Là di Macôr dai liberâi", in vie dai muradôrs.

In **Borc Brossane:**

Timp indaûr a'nd jerin trê ostariis. Cumò e je restade dome une: ostarie "Alla riva del tempietto" logade a çampe, prin di lâ fûr de puarte su lis muris dreçadis sù di Vignesie.



In **Borc Sant Zuan:**

Par antîc, in chest borc, al jere il *xenodochio*, ven a stâi un asîl, un sotet pai forestîrs che vignivin sù dal Borc Brossane o dal borc Sant Domeni. Chest prin che Napoleon al fasès vierzi une puarte in bande de glesie di Sant Zuan, par fâ jentrâ cun facilitât la int e i cjars. E propit a lî a jerin dôs ostariis cun stal.

- Ostarie "Al pomo d'oro";
- Ostarie "Da Janez" (Giovanni Cebocli). Cumò cheste e je un bar. Une volte e veve il fogolâr;
- Ostarie "Al buco" in place Sant Zuan in bande dal Pomo d'oro;
- Ostarie "Da Podarieszach", di front de cjase dulà che al è nassût Vittorio Podresca;
- Ostarie "Alle Alpi", in Place des Feminis;
- Ostarie "Là di Marie" in strete Sant Valantin.
- Ostarie "Ai tre re là di Gjigji de piçule", cun spolert e cusine preseade;
- Ostarie "Là di Namor", te strete dal Mont di Pietât;
- Ostarie "Al Folegotto", in vie Carlo Alberto;
- Ostarie "Là di Starnât"- un esempli significant, in vie Mont Neri, di non tramandât dal secul XVI in ca. Il non al jere Comuzio Starnazio, comandât dal proveditôr di Vignesie in Cividât, di custodî lis fortificacions de citât (i mêrs), dal Borc Brossane al Borc Sant Domeni;
- Ostarie "A la piçule stazion" - sul cjanton jenfri vie Mont Neri e vie Peribola.